

Inatsisartut peqqussutaat nr. 5, 22.november 1984-imeersoq kalaallit tunisassiaasa avammut nioqqutigineqartarnerat pillugu akuersissuteqartarnermut

Kalaallit tunisassiaannik tunisassiorneq nioqquteqarnerlu pillugu Kalaallit Nunaannut inatsit 28. marts 1984-imeersoq najoqqutaralugu aalajangersakkat makku matumuuna aalajangersarneqarput:

§ 1. Peqqusummi pineqarput namminersorlutik inuutissarsiummik ingerlatsivinniit aamma pisortat pigisaanniit tunisassiasiat avammut nioqqutigineqarnerat tamarmi, Kalaallit Nunaanni tunisassianik pisiortortartunut, atuisartunut imaluunniit suliarinnittartunut.

§ 2. Tunisassiasiat Kalaallit Nunaanni pinngortut inuutissarsiutigalugu avammut nioqqutigineqarnerat aatsaat pisinnaavoq Aalisarnermut Suliffissuaqarnermullu Naalakkersuisup akuersissuteqarneratigut.

§ 3. Akuersissut inunnut ataasiakkaanut, imaluunniit piginneqatigiiffinnut tunniunneqarsinnaavoq piffissamat aalajangersimasumut imaluunniit nassiussanut ataasiakkaanut atortussanngorlugu.

Imm. 2. Akuersissut uterteqquneqarsinnaavoq ilimagineqarsinnaappat akuersissummik piginnittoq pissusissamisoortumik sullivik akuerisaasoq pilersissinnaanngikkaa, imaluunniit atatiinnarsinnaanngikkaa.

§ 4. Aalisarnermut Suliffissuaqarnermullu Naalakkersuisoq avammut tunisaqarnermut akuersissutinik tunniussisarnermut tunisassianillu Kalaallit Nunaanni pinngorfeqartunik avammut tunisaqarnermut aaqqiissutissanik erseqqinnerusunik maleruagassalioarsinnaavoq, tassunga ilanngullugu paasissutissanik sanioqqutsisinnaaneq avammut tunisaqarnissamik akuersissuteqarnissamik aalajangiinisaq pingaaruteqartillugu.

§ 5. Peqqusummi § 2-mik unioqqutitsineq akiliisitaanermik kinguneqarsinnaavoq.

Imm. 2. Peqqusut tunngavigalugu maleruagassiani atortuulersinneqartuni aalajangersarneqarsinnaavoq, maleruagassiat aalajangersagartaannik unioqqutitsineq akiliisitsinermik kinguneqarsinnaasoq.

Imm. 3. Aktieselskabit, anpartselskabit, andelselskabit assigisaaluunniit unioqqutitsisimatillugit piginneqatigiiffik taamatut akiliisussanngortitaanermik akisussaatinneqarsinnaavoq.

§ 6. Peqqusummi § 2-mik unioqqutitsineq, imaluunniit peqqusut naapertuutigalugu maleruagassiani atortuulersinneqartuni aalajangersakkat unioqqutinneqarpata pinerluttaalisitsinermut inatsisip arsaarinninnissamut aalajangersagartai atortinneqarsinnaapput.

§ 7. Peqqusut atuutilissaaq 1. januar 1985.

Jonathan Motzfeldt

/

Lars Emil Johansen